

## ZAPÓSLANE

### **Benedikt Dyrlich wupraji so k zapóslanemu „Wostańmy cyrkej we wsy“ Jana Nuka we wudaću SN 31. januara:**

Jan Nuk ma hinaše měnjenje wo zastupnistwje serbskeho ludu hač na přikład wjace hač 800 Serbow (mjez nimi zaslužbni a angažowani kulturnicy a wuměłcy), kiž podpěruja wuraznje iniciatiwu a zjawnu diskusiju k wutworjenju Serbskeho sejma. Jan Nuk ma wězo prawo, swoje „hinaše měnjenje“ zwuraznić a zjawnje zastupować, runje kaž smě kóždy swoje měnjenje měć wo politiskim zastupnistwje Domowiny. Fakt pak je, zo Domowina jako zapisane towarstwo de jure njemóže rěčeć za wšón serbski lud, štož su dotal wšě seriozne posudki w tejle naležnosći (prof. Kotzur, prof. Vogt a dalši) wobkrućili. Do rozestajenja ze wšelakimi měnjenjemi w pluralnej towaršnosći pak tež słuša, zo swoje měnjenje njespytaš z wopačnymi a sfašowanymi twjerdženjemi wo druhich podkłasć a skomolić. To pak bywši předsyda Domowiny w swoim přinošku čini. Tak wón mi podtykuje, zo w swoim přinošku wo kubłanskim wjeršku, wozjewjenym 24. januara, „twjerdžu, zo su mnozy płaćeni funkcionarojo ‚starych časow‘ spytali podusyć spěchowanje serbskeje rěče“. Tajke twjerdženje Jana Nuka, zo su mnozy spytali spěchowanje serbskeje rěče podusyć, so w mojim přinošku nihdže njejewi. Tam steji čorno na běłym, zo su „mnozy, kotřiž mějachu zawěšćene a derje płaćene funkcije, často spytali a pomhali kóždy bazowe rozmyslowanje wo polěpšenju tehdy ideologisce skostnjenych systemow serbskeho spěchowanja rěče a kultury podusyć“. Kak sym podušenje dialoga wo polěpšenju spěchowanja něhdy jako „niski“ wjelelětny funkcionar Domowiny dožiwił, wo tym sym na konferency „100 lět Domowina“ na konkretnych přikładach rozprawjał. Při tym sym wuraznje wjacekróć wuzběhnył, zo běchu mjez nawodnymi serbskimi funkcionarami (tež ze stronskim znamješkom SED) mnozy, kotrymž běštej serbska rěč a kultura woprawdźita naležnosć wutroby. Jan Nuk bě mjez připosłucharjemi mojeho přednoška 29. septembra 2012. Přednošk je wozjewjeny w „Małym rjedže“ Serbskeho instituta, zešiwk 14, pod titlom „100 lět Domowina (1912-2012)“. W tym zwisku spyta Jan Nuk potom dalši króć moju rozprawu „zwjertnyć“, dokelž po zdaću „twjerdžu, zo přistajeni RCW podobnje (kaž w starych časach) jednaja, dokelž njejsu so na kubłanskim wjeršku wobdžělili“. W swoim přinošku sym „jenož“ wobžarował, zo „je škoda, zo so na diskusijach w Kamjentnym domje Rěčny centrum WITAJ a nawodža dalšich kulturnych a kubłanskich serbskich institucijow a towarstwow njewobdžělachu“. A potom sym to přidał, štož bě w kofejowej přestawce z erta mnohich słyšeć: Zo „nawodnica RCW dr. Beata Brězanowa samo tajki bazowy a zjawny dialog doraznje wotpokazuje a jón wědomje blokowaše.“ Tele moje wuprajenje zložuje so na dalše ertne a pisomne informacije. A wosebje na e-mailku nawodnicy Rěčneho centruma WITAJ z dnja 6. januara 2017 šefredaktorej Serbskich Nowin ze slědowacymaj sadomaj: „Iniciatiwa Serbski sejm přeprašuje na swój přeni serbski kubłanski wjeršk 14. januara do Budyšina. Jako Rěčny centrum WITAJ tute zarjadowanje njepodpěrujemy, dokelž njedžělmy zaměr iniciatiwy, kubłansku a kulturnu awtonomiju Serbow wutworić.“ Nowinska rěčnica Domowiny je wobě sadže 2. februara 2017 na moje prašenje pisomnje wobkrućila.